

四庫全書

集部

欽定四庫全書

雙溪類稿卷十四

宋 王炎 撰

啓

謝林寶文啓

小儒干祿但傳誦於陳言大府掄材乃濫充於舉首
所謂隻字榮於華袞不啻一諾重於黃金恐知己之
難酬祇捫心而有感竊謂貴賤以定天下之分禮義
以為人心之閑躁求而得者於義有愆自媒而進者

在禮不許豈惟韋布之類因幣聘而後行雖若置罟
之人以旌招而不往此士氣所以無挫而人才可與
有為至於掃門以見相君執御以事先達雖若此身
之自屈亦非以利而相求逮廉恥之寢衰致賢愚之
同滯既欲策其足以速步未免大其聲而疾呼貴游
有援常先得之寒士無津徒自辱爾遠矣雲霄之路
淒然冰雪之鄉雖有彈冠之思但能仰屋而嘆孰肯
提衡於達宦獨存推轂之公心分涇渭之清濁於胸

中定春秋之予奪於筆下有名世力行此道乃善人
胥待而興可備搜揚宜求茂異如炎者賦才甚下涉
世多奇歸耕欠負郭之田謀仕無封侯之骨祗緣糊
口未免折腰獲居半水之中獨竊二天之庇可以掘
衣而請益不惟斂版以隨羣前望亨衢思染指於羊
鼎退疑薄命或點額於龍門况主人之雁雖有取其
能鳴而大冶之金莫不祥於踴躍意雖汲汲貌若徐
徐敢圖特達之深知驟賜吹噓之餘論評其學則腐

儒之陋烏得淹該論其守則俗士之愚豈能純固謂
有似於恬靜遂曲加於品題與不待求聞者太息方鄭
朴初投於周肆固匪珍奇及海槎一上於星河便非凡
物茲蓋伏遇某官諸儒華蓋六學指南剛大之氣塞乎
兩間仁勇之聲震于一世繫誰之屋燕雀不喧樂我之
園蕭蘭有辨當今日蓄儲於人物圖異時經濟於王廷
遽蔭戚施之病夫且猶有用樽櫨侏儒之散木亦可兼
收遂使賤微仰勤推挽炎敢不篤於稽古返以省躬講

習其所未聞操持其所當守有如皦日窮通必義命之
安敢在下風進退惟步趨之學願由斯而報德庶無累
於知人

謝潘憲啓

庇身節下苟安獨冷之官薦士臺中首拔孤寒之迹不
敢自售無為先容誤辱噓枯而使生實非懷玉而待價
施厚則難乎為報喜極而繼之以慚嘗謂仕非止於為
貧欲行其志義不可以苟得當固其窮惟廉耻之風衰

而利名之念重榮枯之變隕穫於中在下位而俯仰乎人第曰志於得爾居要路而抑揚在我惟其求則與之乞憐以一已之情借重於諸公之請若此者衆莫知其非沉靜自如必謂其棲遲而無援剛方有守又疑其矯激以邀名故起家而宦游或終老於選調世方靡靡而不能返有識所憂人但營營而自為謀公家何補孰處提衡之任獨懷推轂之誠振此滯淹消其奔競有名世力行斯道乃善人胥待而興可備搜揚宜求茂異如炎

者質既不敏數亦多竒謂行藏之所宜雖當稽諸古訓
然涵養之未定無以愈於庸流若附於大賢之門固出
乎平日之願意雖汲汲貌若徐徐敢圖特達之知驟拜
吹噓之賜評其學則腐儒之陋未免空虛語其操則下
士之愚烏能端慤謂有似於恬退遂曲加於品題得之
甚榮聞者太息某官世系東吳之望道原西洛之傳聲
名重於一時許與信於四海必欲得士汲引不謂之私
恩初無容心可否但付之公議要在知其中之邪正非

但度其才之短長意其朴訥而無華可以扶持而有立
特勤推挽不使弃遺炎敢不講習其所未聞操存其所
當守治心養氣志須久而益堅從政臨民學欲行而有
用進修則勉其在已得喪則歸之於天無累知人是為
報德

回黎季忱啓

肄業修藏足以率校官之後進擅場識論卓然冠鄉曲
之時髦人無間言上有公舉某人貌若怯而勇於為義

識雖敏而養之以恬不徒非舉子之文蓋欲探古人之
學得尊王之微旨伸行義之誠心稍吐緒餘即居首選
豈但馳聲於澤國行將發策於天廷自喜知賢在他人
之先願言入仕行平日之志其諸贊慶莫既名言

回楊宰啓

宰于壯縣來自中都方當問塗而上蓬萊亦肯為民而
栽桃李銅章墨綬既藹先聲桑陰麥畦自生和氣某官
諸儒華蓋六學指南不為盈川締繪之文而有子雲深

湛之思璞玉指以為石何損乎萬鎰之珍祥鳳使之在
筵孰儀乎九磬之舞行止姑隨所遇欣戚不入於心歐
陽子歛板於趨庭之時昌黎伯讀書於領邑之際景仰
前哲低回小官未應三年而不飛決知七日之來復炎
火聞高誼獲在同僚將喜登門快睹青雲之雉遽蒙受
簡暗投明月之珠悃悞有懷編摩罔既

賀施叅政啓

代

渙號揚廷真儒當軸股肱宣力欲求文武之全才羽翼

在前遂處東西之兩地豈特臣鄰謹於觀法盖亦夷裔
懼而寢謀九鼎尊安三階明耀某官準繩有守琮璧無
瑕氣涵天地之統極乎剛大學得聖賢之用揆以中庸
方其留簪橐之班盖已儲鈞衡之業越從黃閣進翊洪
樞浸符岩石之瞻宜幹魁星之柄中書立政顓論道於
廟堂右府本兵欲折衝於樽俎不有經綸之素孰堪委
任之隆贊襄萬事之幾密運三軍之末道揆既正庶績
咸熙王靈惟宣四方無侮暨湯咸有一德既契前旒惟

說命總百官行登上袞棊遠分郡寄側聽郵傳雲起龍
驤欣見千齡之會夏成燕賀倍懷一己之私望東閣之
崇深悵左符之拘係具為咏頌罔既編摩

賀隆興程帥啓

代

入覲天顏出臨方面甘泉奏計上知廉訪之勞章水分
符國有藩宣之重歡聲四溢條教一新某官績密自將
溫良無競得於醞藉粹然金玉之純動以周旋謹此樞
機之發東臺批勅既著直聲南服觀風暫將睿旨達九

重之德意勤六轡之馳驅爰自使輅遂分帥閫惟是大
江之右亦登艱食之餘公往頒春民如望歲凝香燕寢
不妨憑刺史之輜曳履龍墀行即荷從臣之橐某自惟
遲暮獲際風猷驛傳所臨恨賜環之既去鄰封孔邇喜
擊柝之相聞慶慰之懷敷陳莫旣

賀湖北吳憲啓

代

入覲清光出恭猷事三尺垂寬平之法容有舞文一麾
竭撫字之勞是宜將指修途迢迢遠俗來蘇某官應物

清明提身廉靖蔚然儒雅壓江左之名流藉甚政聲似
京西之循吏上魚書於嶺嶠持龍節於湖陽惟吏議至
於吹毛則民情無所措手簡求膚使欽恤祥刑為聖明
布不殺之仁使鰥寡有平反之喜雖揚旌跋履小留鷄
尾之墟然簪筆論思即上螭頭之陞某有懷晤語喜見
除書側聞騎從之來敬伸賀悃願備餼牽之禮少展交
情

回袁州曹守啓

代

榮膺芝檢分守竹符五馬鼎來聞說賢侯之撫字雙魚
拜賜首勤君子之撝謙修慶未遑懷慚不敏某官英材
穎秀深識疎通剴劇撥煩解數千牛而刃無闕折發姦
摘伏照十二乘而珠有輝光持虎節於靈山援魚書於
湓浦治聲聞上遺愛在人日邊丙夜之憂欲孚德意江
右宜春之興今號名藩暫領一麾即歸雙闕杲聞風惟
舊披霧末由魯柝相聞幸依仁之孔邇邇雲有爛感陳
誼之甚高喜愧俱深編摩莫寫

回湖北吳憲啓代

抗旌問道幸從者為一日之留持節觀風知遠民有二天之喜未修賀語先辱徽音拜賜瞿然撫謙肯爾某官有學以養其德遇事即見其才方結綬於中都旋把麾於南嶠是皆小試未展素懷豈伊藉藉之先聲而不駸駸於要路果膺細札出駕輜軒要推旒冕之心無有不被其澤必使桁楊之地亦自以為不寃上既深知公寧久外某歸田未遂分閭何堪平世功名所願登崇於俊

又暮年志意但思盤薄於邱園頌咏之深敷陳莫究

謝趙總卿啓

代

改轅八桂脫嶺海之崎嶇乘傳三湘見湖山之清淑仰
奉九重之寵渥密瞻一節之光華推轂有因捫衿知
幸某官天資警敏人品高明秀出金枝絕無貴公子之
習氣名聯玉筍不作諸老生之常談發揮黃卷之經綸
軒輊青雲之步武寬平不擾有西京循吏之風儒雅自
將在南省望郎之選遂以懿親之重出將使指之嚴豈

但舉鞭如見錢流於地上懸知聚米可令敵在於目中
佇奏計於甘泉即陞班於文石某親仁已久聞命惟新
自顧暮途既竭馳驅之力仰依夏屋冀寬飛輓之程

謝荆南陳帥啓

代

乘嶺嶠之單車初無課最分湘中之一節復玷除書旣
揆日以班條乃瞻風而依庇可無尺牘敬白雙旌某官
文揆國華學窺道奧聲名藉甚握蘭會上於中臺風采
晃然持斧屢行於列郡雖要路騫翔之莫禦然此心恬

靜而無求存膺中詔之榮起殿上游之重伍符尺籍盡
提組練之羣緩帶輕裘自壯金湯之險寧久淹於外服
即入覲於清光某受命惟新親仁伊始封疆聯絡可聞
魯析之音帥閭崇深尚覺膺門之峻

謝吳提舉啓

代

踰嶺以南徧覽海邦之陋浮湘而下乃鄰星使之光旣
揆日以攷條敢遡風而修敬某官高文行遠敏識絕倫
方身游璧水之中已志在瀛洲之表白虹騰上莫韜韞

櫝之珍凡馬洗空始見躡雲之足枚選外臺之膚使孰
先南省之潛卽豈惟幹山海之富饒將以問閭閻之疾
苦佇奏甘泉之計卽通文石之班某叨奉德音來恭漕
事分持英蕩敢言有志於澄清獲近皇華少慰此心之
景仰尚期警策免致曠瘝

回邵州潘守啓

代

祇膺璽詔移守銅符蔚然戚里之英屢騰治最分此名
城之寄益簡清衷甫聞五馬之來驟拜雙魚之貺某官

清修自立俊邁不羣家有朱輪獨薄膏粱之味學該黃
卷俯爭韋布之衡繇國貴游為時循吏昔襦今袴已留
澧水之去思森戟凝香更散扶江之和氣雖暫留於外
服即入覲於修門某久倦馳驅頗嗟間濶舊綰東陽之
綬獲際英猷茲乘南服之輶復聯王事其為贊慶莫究
敷陳

回武岡趙守啓

代

乘輶嶺表易節湘中方視龜拜改命之恩乃烹鯉辱修

辭之間某官琢磨素履被服古文在貴介公子之中居
賢士大夫之選回旋撫仕章徹能稱以卓然公室之長
材撫蕞爾偏方之孤壘發硎游刃姑小出而試之策足
要津即疾驅而進矣某遠將睿旨更奉除音聖主
憂民當體寬平之意賢侯為郡豈煩廉問之勤言則有
窮情終莫寫

回趙帳幹啓

代

榮奉宸綸來司計籍屈此宗枝之秀增吾使節之華方

竊喜於同寮乃首勤於貽問某官銀潢湫潤棟莩聯芳
騰達先聲自合問津於天上逶迤緩步尚煩借重於臺
中然宗盟在異姓之先豈賢德無裏言之助逮茲脂轂
恐即賜環某比拜除音甫恭漕事聞兔園之令譽甚幸
鼎來得魚素之好音更懷謙抑其為贊慶莫究敷陳

回蕭參議啓

代

侯藩植屏軍事尚謀惟金匱六韜出奇而無窮則虎符
尺籍可借以為重密資遠畫小屈儒英某官恬靜無求

清修有守文章固其能事本韓柳之正傳智略不以自
名與孫吳而暗合當即鳴龍墀之珮乃來挹燕寢之香
緩帶從容暫對湖山之清淑賜環優渥豈遺人物之風
流某久矣聞聲喜於聯事據床而分風月在我固所願
然聽履而上星辰恐公不久淹耳其諸贊慶莫旣名言

回全州趙守啓

代

榮疏芝檢守重竹符惟至尊勤恤於遠民雖支郡精求
於良翰歌袴襦之來暮擁旌旆以行春某官育德清明

秉心肅括才堪國器宜翔翥於中都志在民庸尚藩宣
於外服帶衡山之南麓居湘水之上游不惟壤沃而泉
清盖亦俗淳而事簡是為樂國易以撫摩更得賢侯使
之懷附佇看凝香之暇即聞召節之趨某久稔英猷欣
聯王事方辱貽賤之溫潤可占臨政之慈祥贊慶之私
敷陳罔究

回馬宜州啓

代

肅將漕事行嶺海之遐陬叨奉除音得湖湘之善地敢

謂隼旗之遠遽勤魚素之頒某官投筆志高枕戈義壯
飛騰燕領壓山西六郡之良舒卷龍韜得圯上一編之
秘把旌麾而畫諾總弓劍以護邊遠俗清平羣蠻讐服
賢長城遠矣小施智略之奇借前箸籌之即赴功名之
會某曩因乘傳喜獲同寮受命改轅方嘆山川之隔修
辭授簡重煩使介之來感愧之私敷陳莫究

回林撫幹啓

代

芝封新命蓮府英游得佳士於幕中佐元侯於閫外未

施婉畫已藹先聲某官擢秀儒林鉤深聖域文采織天
孫之雲錦清修佩楚客之幽蘭橫經半水之宮飛鳥一
雷之地恬於進取養以沈潛燕寢凝香始暫煩於叅贊
龍墀委珮當嗣有於褒嘉某久矣聞風喜於聯事辱貽
緘之委貺知會弁之有期贊慶之私敷陳難究

與靜江詹帥啓

代

久去中都遠內朝之簪橐叨分外闡鄰大府之旗旄雖
欣擊柝之相聞又屬剖符之有守往徹隸人之聽可無

行李之勤敬問興居少伸繾綣某官斯民先覺此道正
傳志定氣完得古人之渾厚識清學正折至理之精微
外流愷悌之聲入罄忠嘉之蘊為時宿望結上深知
羽儀文石之班調護青宮之德然天子憂勤之念
下及閭閻而海邦凋瘵之餘宜更鹽策遂繇禁從出撫
价藩海宿山行自此有阜通之利蠻煙瘴霧變而為清
淑之風豈齊鉞之能淹即介圭之趣觀某自惟孤拙獲
廁交游問五管之途將乘一傳在三湘之上遽換雙旌

聞啓殿之徐來幸封圻之孔邇中心欲寫但憑烹鯉之音書會面無因徒渴揮犀之晤語炎州地暖青陸春回願精饗寢之調上副冕旒之眷

回張運幹啓

代

當軸掄材庸示超陞之漸乘輅將漕獲資趣辦之能雖未識於英姿已稔聞於高誼某官凜然豪氣飾以清文干將紫電之輝不應久晦騏驎青雲之足乃肯徐行居半水以橫經倚二松而搜句頗淹雋軌寢藹休聲接天

廷金馬之游正須公等佐澤國木牛之運暫借賢勞某
方幸同寮遽蒙貽問決知臨事必無袖手以旁觀恐不
淹時即有裏言而迅召

賀楊提舉啓

代

天廷出節澤國乘輅上顧周行深欲純儒之在內民
多凋瘵正須膚使之觀風六轡載馳百城胥慶某官正
學可以經濟清文乃其緒餘在東閩多士之中早騰妙
譽居南省望郎之選寢著英猷自合留中邇來將指惟

此三湘之外頗困荐飢方登一稔之餘僅能平糶曩者
儲蓄稍闕其備是以水旱或為之災佇多紅粟之藏因
時歛散即擁紫荷之橐入侍嚴凝某幸並里居獲申交
契茲分外闌喜聞一傳之來屬剖左符當受六條之察
其為贊慶罔旣編摩

謝廣東熊憲啓

代

馳湖右之單車未能平糶分湘中之一節服昇祥刑願
依鄰燭之光適近使星之次可無尺牘往白雙旌某官

曠度深沉英姿果毅飛揚燕領壓山西六郡之良舒卷
龍韜得圯上一編之秘合上齊壇而受鉞姑乘驛傳以
褰帷庶獄得情益振繡衣之風采羣蠻奪氣不勞白羽
之指麾使里閭無枹鼓之音雖嶺海如輦轂之下上
方嘆息而思頗牧欲壯王靈公既智略之似孫吳宜當
戎翰某服膺甚久識面末由茲叨奉於除音遂來供於
猷事漢條所察敢言有志於澄清魯拆相聞少慰此心
之景仰其諸悃悃莫既編摩

謝廣西詹經略啓

代

一節觀風未及修於荒政十行出命驟改畀於祥刑望
帥閩之崇深幸鄰封之聯絡往徹記曹之聽可無行李
之勤某官拱壁含章元龜見曉精微自得靜而探聖域
之傳詳練有餘動則中事機之會行藏無枉義利必分
羽儀從索之班翼贊儲闡之德係時雅望為國老成
冕旒軫念於遠民牙纛開藩於南海議法欲公私之兼
裕鹽筴流通臨邊貴威惠之交孚戎車整暇豈但璽書

之狎至即聞環賜之遄歸某久隔憑茵游更輶傳敢不
體九重之欽恤未能盡五聽之清明念攬轡以馳驅
周行原隰想凝香之宴笑尚間雲山願賜誨言免貽官
謗

賀史舍人啓

代

中宸疏寵右掖陞華上顧周行喜黃閣帥臣之有子士
無異論稱紫微書命之得人王猷一新國體增重某官
志定而有立材全而不形正大之學得諸家傳俊秀之

聲孚于民聽文章直餘事耳素蓄經綸富貴吾自有之
不因閹閹起西京視草之手居北省判花之聯彼常袞
但長於除書難顯潤色而崔琳可問以今事詎曰淹該
得我鴻儒光於鳳閣某外分符手側聽郵傳演綸誥之
音旣發攄於妙語補袞職之闕必簡注於清衷贊慶之
誠敷陳莫罄

回趙機宜啓

代

出綸新命入幕英游暫煩棠棣之親增重芙蓉之府某

官潛心儒業擢秀宗盟早聯玉筍之科荐著銅章之最
聊資婉畫來贊名藩鼓角清閒無待揮毫而草檄湖山
平遠不妨寓目於登樓姑以養資佇聞迅召某曩嘗識
面久不嗣音烹鯉得書乃有同寅之喜揮犀晤語可諧
道舊之私

賀王侍郎啓

代

擢自儀曹陞于選部雖中臺正位久居簪橐之清班然
小宰掄材尤號衣冠之極選龍光滋厚爵列逾高某官

正學得於家傳敏識周於世務危言無隱卓然副當宁
之心特立不回足以作搢紳之氣乃由烏府徑上丹墀
右掖代言既絲綸於訓誥左行議禮以黼黻於典章職
豈弗清材猶未展仰承帝制進貳天官入仕之途雜而
流品莫澄循資之格密而賢愚同滯若欲釐法之弊未
免咈人之情惟藻鑑之精明必權衡之平允某外分符
守側聽郵傳上意方隆姑付以三銓之重物情益附
必居於四近之聯贊慶彌深敷陳罔究

賀史侍郎啓代

選賢右掖正位中臺誥命流傳旣用舍人之樣典章明
備宜新禮閣之儀官以德居士皆心服某官吾儒華蓋
今事指南望實俱高家有公師之赤舄忠良相繼人宜
父子之緇衣國所重者世臣班遂陞於汝從揮翰紫微
之省潤色綸音授經蒼震之宮琢磨玉質遂承書接晉
貳春宮清識淹該亦暫持於荷橐遠猷經濟終必上於
槐庭某久託餘光逖聞新命為公朝而贊慶知善類之

方亨

回趙道州啓代

承命分符洎辰洗篆所以慰遠民之觀聽在於宣上意
之慈祥風動一麾春回千里某官操修之篤靜重而文
繇國懿親之賢居時能吏之選春陵輿壤瀟水上游雖
泉石清幽可發元子新奇之句然閭閻彫瘵宜殫陽城
撫字之心惟其游刃於盤根繇此着鞭於要路某近方
會面游辱嗣音郡有循良何待六條之察帝思俊彥佇

聞一節之趨贊慶惟深敷陳罔究

賀趙總領啓代

天陞疏榮星輶將指重上游之勢選望實於宗盟總外
計之權調盈虛於兵食風行六路恩浹三軍某官恬靜
無求清修有守動則見太阿之鋒穎粹然藏璞玉之圭
璋三剖銅符推仁心而撫字兩持繡斧伸直道以澄清
惟江漢之要津有荆襄之重鎮雲屯萬竈日費千金必
得能舒卷之通才乃可致公私之兼裕遂繇郎省來護

師干蔚然棠棣之親賢送以皇華之禮樂舉鞭而錢流
地上既趣辦於軍儲聚米而敵在目中必習知於邊事
佇上甘泉之計即陞文石之班某久矣仰高茲焉借潤
門闌在望幸鄰雙節之光竿牘將誠乃殿百函之末其
為欣愧罔既編摩

回趙知軍啓代

侯藩撫字不憚勞心治最升聞豈煩薦口輒冒推賢之
美備言奏課之優某官繇國懿親為時良吏德慈祥而

能愛政簡靜而不煩森戟凝香據黃堂而畫諾無襦
袴藹赤子之歡謠雖不為赫赫之聲而獨收上上之考
擁一丈之蓋衆固願於借留放十行之書上方嚴於趣
召某觀諸賢業酌以民言拔茅茹以同升善宜無隱投
木桃而獲報義不敢私

謝宰執啓

代

義釋義經徹冕旒之乙覽恩疏漢詔獎鉛槧之辛勤仰
瞻咫尺之天光垂照尋常之穴見喜雖榮於寵錫懼莫

稱於褒嘉竊以道載六經易闢三聖理存於畫文王重
以生文意見乎言尼父述而為傳顯足以措諸事業妙
至於行乎鬼神奈何後人以為卜筮之書繇此學者莫
探乾坤之蘊田何所受流於京孟之誣王弼未知雜以
老莊之說自開戶牖輕弃筌蹄論互體者略而未詳辨
繫辭者信之不篤泛考衆言之異精求至當之歸四象
具則八卦之體全十翼明而二篇之義著仰望虎文之
變聖則生知俯慙馬智之專學非自得妄謂食芹之可

獻敢期采菲之無遺給簡示優遂成綃帙奏篇稱善驟
錫璽書燭火至微何益日華之明潤璇霄雖遠獨瞻奎
畫之光芒不有先容易膺殊渥恭惟某官為時先覺得
道正傳贊乾之元幹機衡於國秉致貢之飾煥經緯於
人文示盛世之崇儒推公心而與善顧此編摩之久矜
其探索之勞未窮綠字之深微亦被玉音之勸獎某要
當守其所學毋徒託之空言細札十行為終身之焜耀
陳編三絕愈篤志以沈潛

又代

西州乘傳愧無廉問之能南海剖符誤玷藩宣之寄思
叨逾之所自荷記錄之不忘延見耄倪布宣德意念五
羊之會府統百粵之偏方內撫列城欲蠻貊之不擾外
通諸國期海道之無虞宜得長才用綏遠服如某者本
無實用徒有樸忠平日行藏僅不違於義命莫年游宦
豈復忘於事功繇均餼於殊庭得觀風之一節歲稔民
病未聞振乏之勞俗弊獄繁莫著明刑之效悵道途之

僕僕閱日月之悠悠此於責實之朝難在陟明之列驟
頒詔璽俾領州麾陞之延閣之華付以元戎之重冒榮
已甚揣分奚堪錫命自天感恩有地某官清明洞照博
大兼容程職業以齊百工使皆陳力執道揆以詔八柄
初無容心遂令案稅之微材亦被鈞陶之大造某敢不
益堅素守務答鴻私訓治兵農考難書於上上懷來夷
裔策惟出於平平庶推君相之仁徧及要荒之外

回趙叅議啓

代

璽書疏寵油幕談兵常棣懿親難抱長才而退處芙蓉
大府可無重客以咨謀婉畫未施先聲甚美某官宗盟
擢秀士論推賢貳政京城小着鞭而展驥撥煩望郡無
迎刃之金牛兩怒者必多惡言三已之終無愠色特煩
參贊用壯藩宣鼓角清閒不草陳琳之檄江山平遠宜
哦工部之詩姑以養資即聞趣召某曩嘗識面久不嗣
音烹鯉得書甚喜故人之至揮犀晤語庶伸僚友之情

賀王侍郎啓

疏榮書贊正位儀曹必待積德百年適逢熙運有能典
朕三禮允屬洪儒王度備成物情胥慶某官忠精許國
文獻承家蘊於中者碩大而深純發於用則光明而超
卓南臺端簡旣於抨彈見御史之真西掖演綸不止文
字傳舍人之樣士論翕然歸重帝意知之愈深式彰書
接之勤遂陟春官之貳朝廷緝典固能兼三代之質文
臺閣新儀亦欲刺六經而述作留清班於簪橐儲雅望
於鈞衡某久挹英風欣聞新命侯藩有守莫陪賀客之

塵賢路既亨敢贊公朝之慶其諸頌咏罔究編摩



雙溪類豪卷十四

欽定四庫全書

集部

雙溪類稿卷十五

詳校官庶吉士臣吳烜

主事臣呂雲棟覆勘

總校官進士臣朱銓

校對官學正臣翁樹棠

謄錄監生臣任銜萱

欽定四庫全書

雙溪類稿卷十五

宋 王炎 撰

啓

賀趙總領冬啓

黃鍾肇始甫當來復之時金節有光倍擁類升之福某
官才周世用望著宗盟華貫翱翔旣含香於郎省上
游控帶暫餽餉於師干宜同陽德之亨益茂神釐之
介某叨乘使傳阻造賓墀敢伸削牘之恭遙贊稱觴

之慶

吳提刑

象候清堂日躔南至灰飛緹室卦直中孚繇議獄之持平用對時而迪吉某官端莊而無偽簡易而有文雖宣布詔條凜若清霜之肅物然哀矜鰥寡溫如和氣之嘘枯宜五福之類升協一陽之來復某密鄰使傳阻造賓閔敢伸削牘之恭少贊稱觴之慶

吳提舉

七日陽來協天正之肇始二星光著映雲物之殊祥既
復而亨為泰之兆某官高文炳蔚敏識清通布上湛恩
日可愛而羣情胥悅係時公望春未回而萬物先知默
觀天地之心當啓明良之會某密依使傳阻造賓閣敢
伸善頌之誠以贊繁禧之介

馬提刑

日躔南至卦直中孚繇簡書議獄之持平宜玉節對時
而迪吉獲預同寮之好敢忘善頌之私某官體道据中

秉心迪哲輟名卿之聞望增膚使之光華雖吏膽俱寒
凜若清霜之肅然民情胥附溫如愛日之和迪五福以
類升協一陽之來復某乘輅伊邇望履無繇莫順下風
舉一杯而為壽敬因穀旦修尺牘以將誠

汪提舉

時當來復微陽潛應於黃鍾物以類升和氣先隨於玉
節獲預同寮之好可無善頌之勤某官喬木故家渾金
厚德分持一節雖專堯山海之饒恭布六條不但挾風

霜之肅宜神休之滋至與陽德以俱亨某幸近乘輶稍
踈會升舉鸞觴而為壽阻造賓闕修魚素以將誠敢陳
記室

京運使

天正謹始氣既協於三微星使觀風祥宜膺於百福某
官受材英特毓德清明入處烏臺陰自消於見睨出持
龍節物俱望於回春况黃鍾應律之時兼畫戟凝香之
樂宜神休之滋至與陽德以俱亨某望履非遥登門無

自莫致稱觴之慶敬伸削牘之誠

賀蔡總領正啓

辰起蒼龍日行青陸王正肇始氣旣協於三陽使節揚
休慶宜膺於百福某官英猷經遠敏識見微結宸眷於
九重陞華嚴近總邦儲於六路借重將明宜翕受於春
祺卽茂承於天寵某分符有守望履無由輒修削牘之
恭用贊稱觴之喜

京運使

蒼龍移陸青帝司春式迎端月之和茂迪使星之慶某
官德溫而理氣肅以清暫輟直於烏臺出董輸於驪駕
湖山清遠散一節之仁風天地和同擁雙旌之喜氣旣
協泰來之吉即承晉接之榮某目企門闌身縻符竹阻
奉觴而為壽但削牘以寓誠

吳提刑

春王謹始迓淑氣之潛回星使觀風擁殊祥之滋至某
官處心豈第應物清明分瑞節之皇華光臨南楚鞠園

靡之茂草仁轉東風即承晉接之榮用協泰來之吉某
屬縻符竹莫望茵憑但修削牘之恭遙贊奉觴之喜

趙丞相

斗指孟陬律諧太族日行青陸和方散於東郊星拱紫
微光下臨於南楚對四時之攸始集萬福以惟新某官
秉德格天體仁育物曩者運璣衡於左揆四海回春今
馬擁牙纛於上游一方蒙福肇茲人正介以神釐三之
日開泰以時欽承注意萬斯年匹休於國永賴調元某

目想台閣心驚歲籥莫陪旅進奉椒醑以輸誠但祝公
歸冠槐庭而正位

曹守

攝提紀次太族宣和道迎木德之亨裒集竹符之慶甫
寫誠於一紙重委貺於朋緘恭惟某官摘伏精明撥煩
閒暇旣積優而治最游假寵於侯藩惠浹四郊方班春
於漢詔喜隨一節行就日於堯庭某敬閱雲牋莫瞻星
弁遙贊履端之吉但勤善頌之私

趙丞相

辰起蒼龍日行青陸儼上公之袞繡德與時新擁大府
之旌旄喜隨春至三朝謹始萬福來宜某官道妙彌綸
志存康濟乾坤洪造資金鉉之調元江漢上游屈玉麟
之出守茲履端於人正彌受益於天休佇聞晉接之勤
用協泰來之吉某職縻剖竹心感頌椒望雙節之煌煌
莫陪旅進占太階之兩兩但祝公歸

蔡總領

斗指孟陬律回太族王春頒朔肇開泰道之亨卿月凝
暉益介鼎新之慶某官才推秀整氣備清溫茂對寵光
擁使輶而星指總司餉饋護師壘之雲屯迓三陽奏地
之和申百福自天之祐歸承晝接道與時亨某借潤雖
深趨風無自介茲眉壽愧莫奉於椒觴寫此心期敬遠
馳於魚素

汪提刑

青規發育肇開泰道之亨玉節光華宜受鼎新之福某

官清和兼備寬厚有容折獄哀矜歛威嚴之霜肅問民疾苦宣德意之春溫茂迎端月之和益介自天之祐佇見雙旌之喜色歸瞻九陛之清光某阻望星軺存更歲籥鄰封相比獲依棠蔭之陰賓序非遙莫獻椒觴之壽

陳運使

辰指孟陬歲開朔旦占門庭之色澤喜與春浮擁繡斧之光華福承天錫某官韻諧宮角德韞圭璋將使指以轉輸宣德心之溫厚茂迎端月丕介殊祥政貴鼎新方

喜雙旌之至時逢泰吉佇聞一節之趨某借潤有初披
雲無自介茲眉壽歎莫奉於椒觴寫我心期但遠馳於
魚素

趙守

日行青陸方肇三陽春擁朱轡宜增百福某官才稱臬
俊志在鷹揚未施金匱之六韜暫總銅符之千騎民歌
襦袴東郊旣散於仁風上錫璽書北闕即承於晉畫某
載馳軺傳莫造鈴齋重勤行李之音但感頌椒之咏

馬提刑

王春謹始化方運於青規卿月迎輝和自隨於玉節茂
對三陽之泰坐迎五福之升某官氣肅而溫德剛以順
執法嚴理官之守讞疑增膚使之華存對東風變園扉
之草色更觀遲日轉茂舍之棠陰行膺晉接之榮以迪
鼎新之慶某濫司戎閫獲適星輶第修尺牘以將誠莫
舉一杯而為壽

汪提舉

斗指孟陬律回太族璿璣默運四序更端金節道和百
祥並集某官德則溫其如玉氣亦煖然似春將指乘軺
六轡有光華之盛推仁發庾百城在涵養之中道旣與
時而行進當承晝之接某定交旣舊聯事惟新遠想賓
閔但感頌椒之咏敢干記室用伸投簡之誠

與交代區權縣啓

小邑備員得下澤葭葦之境賢侯攝事借春風桃李之
陰第愧續貂不能晞驥未敢趣裝於下走合先修敬於

隸人某官文揆春華學通時務積年頓挫而不試養之
使全遇事疇酢而有餘見者稱善屬一司之瘼職資三
異以承流有如游刃之才高所恨割雞之用小諸公推
轂將下轉而上聞要路着鞭亦先鉞而後利炎不嫺吏
治偶脫選曹久矣諱窮無一廛而寄足急於就食為五
斗而折腰雖瑟調不可以更張然錦美豈容於學製顧
瓦礫在後必無趣辦之能毋金玉爾音惟幾告新之益

與鄧教授啓

承乏校官嘗近德星之里社備員屬邑獲依泮水之先生適有此緣不勝其喜敬致雙魚之素仰塵三鱣之堂某官行必踐言志惟狗道韞圭璋而內映所養者醇決江漢以東流其文有本聊作外諸侯之客不卑郡博士之官豈惟膏馥之品儒正要淵源之灌注雖布衣承學之士願公少留然金馬著作之庭以賢為重不煩推轂即有賜環炎近脫選曹未聞縣譜繇銅章之俗狀望絳帳之清姿偶然游宦之同迥若仙凡之隔惟儒學詩書

之化一變民風庶訟庭牒愬之稀少寬吏責區區所蘊
喋喋難窮

與趙節推啓

開青雲而覩雉緬懷鄂渚之舊游泛綠水以依蓮屬在
巴邱之下邑其為間濶之日久矣願申疇昔之好可乎
搖我心旌望公眉宇某官圭璋其德斧藻以文脫腕萬
言藉藉有聲於江漢摘髭一第駸駸可上於星辰繇黃
綬以借資贊朱轡之畫諾千里陰受其賜居多入幕之

謀諸公交薦其賢行見追鋒之召炎浪隨宦牒偶脫選
曹竭來親雁鶩之塵乃墮在蒹葦之澤未知縣譜恐戾
官箴賴有故人可講一日從容之雅庶幾明府肯垂二
天覆護之恩悃悃之情編摩罔旣

與饒節判啓

有事拙謀墮葭葦瀕江之地人誰庇已仰芙蓉幕府之
英敬自達於姓名因少攄其情實某官識精而敏德簡
而文有飛黃致遠之材不行捷徑具結綠含章之美可

敵連城惟史君撫千里之封故賓佐極一時之選陪畫
諾黃堂之上挹凝香畫戟之間赤壁江寒洞庭波穩胡
床談笑不妨風月之平分魏闕進趨即看雲霄之直上
炎學非有用仕本為貧最爾井疆之微蕭然風景之陋
雖所製固非美錦而在前乃有覆車自顧腐儒曾未聞
於縣譜幸依君子庶無戾於官箴祈向之私有言莫既
與梁知錄啓

脫選曹而試縣拙矣割雞攀府掾而事賢難乎附驥妄

意快景星之覩終期借慶雲之陰某官族系光華材猷
膚敏長離之文五色歛翮將翔豫章之榦百圍深根自
養屈居上佐糾正同寮以哀矜察庶獄之情以精練了
公家之事英聲藉藉已聞推轂於當塗緩步翩翩即見
着鞭於要路炎得邑最爾揆才闕然豈惟未辦種河陽
之花抑亦無以藝彭澤之秫幸逢明府君寬厚之政可
以少安更賴大君子挈提之私略其不逮

上林倅啓

與生徒誦說古今本無他技為臺府督催租賦未必能
官幸而依牛刺之寬洪或者容一夫之遲鈍敬修奏記
仰告成期某官卓爾真賢起於華胄龍文赤鼎獨立可
以鎮浮驪足青雲緩步終於致遠深袖經綸之手不萌
進取之心曩嘗撫花縣之封民懷其惠逮此貳竹符之
守衆賴以安聞將解綬以造朝必有追鋒之急詔儻或
趣舍人之裝於踰月尚能通閭吏之謁以趨風炎無尺
寸之長急斗升之祿拙於擇地一鄉最爾而甚微責以

取材千戶蕭然其無有雞戶之小如此鼠技之窮謂何
拭目緹屏所恨事賢之日淺束身墨綬不勝依德之情
深

與巴陵郭簿啓

談詩書半水之宮技止此爾分民社一雷之地人謂斯
何幸魯柝之相聞有潘花之可蔭自惟依德之情切矣
願講交鄰之好可乎某官佩明月之珍抱青雲之器豈
但勾稽之縝密更不能欺至於剖決之精明民皆相慶

發於小試動則有聲飛鳥雙鳬安得回翔於壯縣刻章
一鶚即當軒翥於亨衢炎不憚折腰正緣糊口所謂米
鹽之務惟旣厥心更期金玉之音俾提其耳庶見發硎
之銳免為製錦之傷

與巴陵吉尉啓

葭葦之中為縣甚矣拙謀蘭菊之芬襲人幸哉接境謂
其聞魯之擊柝而以借楚之餘波詎得無言以申此意
某官敏無滯事清不近名凜然綵棒之風生里閭相賀

隱若洞庭之波穩舟楫不驚雖雅意不貪於著鞭然諸公願為之推轂搏九萬里之翼宜致遠於天衢照十二乘之珠幾分光於鄰邑炎正緣糊口不憚折腰將欲束裝而來若為撫字之策儻獲傾盖而語可得箴規之詳欣幸之私有言不旣

上岳州盧守啓

法有所限莫辭墨綬之塵勞事非敢專必聽黃堂之約束雖所製未為美錦而在前乃有覆車惟厚德恢乎其

能容故私心恃此而不忍三薰身而修敬九頓首以馳
誠某官淵靜鎮浮清明燭遠律呂自黃鍾而始氣備中
和圭璋乃白玉之文道兼華實久儲公望寢著民庸閱
柳子黔山巫水之銘旣招懷於蠻獠訪周郎赤壁巴邱
之跡荐綏輯於兵農燕寢凝香胡床坐嘯得其體要足
矣不親細務之米鹽何以督責為哉稍寬屬邑之轡策
新賣劍買牛之習興無襦有袴之謠公盍少留爭願借
竹符之守上所注想當徑陞荷橐之班炎無尺寸之長

急斗升之祿謬於擇地一鄉最爾而甚微使之理財千戶蕭然其無有雞戶之小如此鼠技之窮謂何陰樾焉依儻容其遲鈍之恭職散材無用但誓以庶勤而奉公悃悃之情編摩罔既

荅陰學諭啓

作縣之難今世以為通患從政之敏儒者未必皆能幸而在君子之鄉或者寬長官之責某人詞華之美操履之純為領袖於諸生廣絃歌於千室與邑子游鄉校而

議政固所願聞使里人望廬舍而息爭尤為有賴未遑
修記驟辱貽牋陳誼甚高愧於得錦繡之段而無以報
依仁孔邇庶乎入芝蘭之室而聞其香心之所懷言不
能既

上趙丞相啓

賤有司之為邑怵惕於中大丞相之開藩照臨其上自
顧挈餅之守素無製錦之能孰為廣廈之幃幪幸近洪
鈞之塊北三薰身而修敬九頓首以馳情某官惟德格

天以誠許國言皆可績副聖主之所願聞事在必為
任諸公之所不敢然而道大則難合所以位高而弗居
進退以時卷舒自我身雖遠而在外義則顯於愛君寬
朝廷西顧之憂司管鑰北門之寄以整暇練三軍之
步騎以慈祥輯四鄙之耕桑緩帶輕裘威譽旁行於邇
瑣清香畫戟仁聲充滿於江臯竊聞道塗之言歷數將
相之舊惟公耆德為世重臣與其鎮撫於山川曷若謀
謨於廊廟俯觀物望仰察帝心即上玉麟再調金鉉展

經綸可大之業成恢復無疆之休炎出自困窮安於瓠落雖有脫選曹之喜而思為縣吏之難最爾一鄉蕭然千里欲撫字則財於何取欲趣辦則民所不堪厥或曠官若為苟祿望繡裳之密邇歎墨綬之拘縻三事掄材尚不遺忘於微賤十連察吏庶其覆護於孤寒欣畏交懷瞻依在念

迎賀荆南帥閻侍郎啓

上初嗣服欲得封疆之重臣衆有公言無踰臺閣之舊

德自漢中而移鎮撫荆渚以臨邊隱如長城扞此方國
某官淵源之學經緯之文疏通之才剛大之氣潛蓄者
如此其厚發揮之自然不窮間關出蜀道而來風采在
漢庭之右夫內則處六官之列與外而位九牧之尊是
曰得時便於行志衆人視此鮮不以利達動乎其中君
子居之必欲以功烈見於當世況方面之輕重係敵情
之屈伸茲為上游之衝古稱用武之國幸而無方內之
犬吠可以集目前之燕安民兵散於田畝而虛有其名

未能熟旗鼓之節官健聚於營壘而不作其氣徒以耗金布之藏私商盛則盜伏其間緩之必縱而急之必變常賦輕而民窮於下督之不可而弛之不能朝廷為是選文武之英會府所以兼兵農之寄惟閒暇經營之不苟毋務因循則安坐談笑而有餘何憂倉卒在今日清明之初政宜此邦屬望於元侯然而為之藩垣特一方之福爾至於授以魁柄又四海之願然災以一陋儒在此彫邑遇事多掣其肘字民徒勞於心眊然無異

於庸人何以求知於先進踴躍自喜欲少見平昔依歸
之誠猖狂妄言不但作尋常賀慶之語其為悃悞罔既
編摩

迎賀岳州田倅啓

外諸侯之守鎮撫斯民半刺史之尊通行其政上所識
擢衆皆觀瞻某官實浮于名德見於行器堪致遠常陪
玉節之英游智在養恬不問青雲之捷徑從題輿之借
重承剖竹之維藩三江五潞雖據形勝之地四邑萬戶

未復承平之時藹然仁厚之聲慰此旄倪之望專城畫
諾固資別乘之功當宁思賢行拜出綸之召炎不暇擇
地正緣為貧有如投足於薄冰憂其不免茲幸庇身於
廣夏或者少安欣抃之私編摩莫寫

迎賀梁總領啓

重兵宿於要地以信臣領其轉輸明詔謀於大庭許諸
公有所論薦竟繇親擢乃得實能綸命流傳輿情欣愜
某官才全而識敏志定而氣和術業足以濟時聲名著

於將指觀風行而草偃推善人去殺之仁知川竭則谷
虛體王者富民之意帝念上游之萬竈日殫經費之千
金選擇自乎淵衷光華增於星使固吾邦之守衛形敵
國以富強操六路之贏資錢流地上入九關而計奏敵
在目即綴近班盡攄素蘊炎起家寒甚得邑蕭然繭
絲保障不可以兩全簿書期會若何以逃責一官乃身
之累髮種種以彫殘萬間為庇之多心搖搖而瞻邈

與周知錄啓

英躔所次榮居府掾之先法守至詳糾正官寮之失依
芙蓉而增麗萃棟宇以聯芳某官學積於身仕行其志
高足安於徐步終到亨衢敏手妙於撥煩常新游刃使
所居之官大見有用之才全吏不能欺財何憂乎不足
獄無所枉民自喜於無冤佇聞推轂之裏言別拜出綸
之新渥炎隸於屬邑仰止清規遥睇茵憑心雖馳而身
繫敬修竿牘詞則淺而情深

回唐解元啓

待有司之公選抱先聖之遺經笑談場屋之中自期得雋
睥睨譙門之下果見飛英鼠輩何為龍媒遂出某人
文無蹈襲行亦雅馴雖懷璧不可以越鄉幾於賈禍然
發矢必期於破的所以運奇從容盡史之神閒披靡小
巫之氣索取青氈之舊既可壓於爭心奪錦標而歸當
更觀於巧手

回胡解元啓

崔書求士鶚薦推賢姓名在百里以單傳詞賦於一州

而獨步喜英材之翔翥起老令之推頹某人學務汲深
識思致遠擔簦久出素有志於功名挾策來歸果獨先
於流輩聞陽春之寡和合月旦之公評樂止一夔所謂
少之而為貴經聯千佛即當自此以超凡贊慶之私有
言不旣

回徐尉啓

里門密邇廼無識面之因官牒差池適有同寮之幸喜
最爾蒹葭之渚來蔚然蘭荊之芬某官學非空言文得

正法決科入仕議論直而無欺歷考借資志意恬而不
躁德兼慰畏盜必逃奔綵棒在門將快百里之先覩金
閨通籍佇有羣公之裏言炎翰墨陳人簿書俗吏慚無
仁術致桑下之雉馴尚倚英風止花陰之犬吠敬酬函
賜翹想車音

回彭秀才啓

蒼蠅點壁物惟其潔而易汙鴻鴈傳書事或以虛而成
實然知過貴於能改而止謗在乎自修某人將出幽而

遷喬無惡濕而居下誰能膠其目而不視未免困於心
而後懲雖無桑中之期難學柳下之可往者不可諫矣
勿蹈前非此物奚為至哉盍思自返長牋委貺雅意甚
勤敢陳藥石之言愧匪瓊瑤之報

賀趙倉啓

平糴惠民顓任皇華之冑使疏榮將指孰踰棟蓼之懿
親方析魚符就頒龍節先聲藉甚輿誦藹然某官體道
据中見幾迪哲屬尊且近先周室之宗盟政簡而寬冠

漢京之循吏所以蓄儲於公望不惟撫字於侯藩天空
而日月自高仰聖心之繼照本固而枝葉必茂閱燕齒
以求賢暫凝坐嘯之香即攬按行之轡八政先於足食
農末何傷六條顓以察州官曹皆肅不待奏甘泉之計
即當陞文石之班炎困頓半生艱危萬狀只緣糊口未
免折腰繭絲保障不可以兩全簿書期會若何而逃責
一官乃身之累髮種種以彫殘萬間為庇之多心搖搖
而瞻邈

賀薛漕啓

命出中除任顯外計部刺史之選上欲寄以咨詢諫大夫之來下熟聞其風米輜軒壓境興誦載塗豈無他人可以付漕轉之事必有君子乃能蘇凋瘵之民某官人物超乎漢唐師友得諸洙泗潛心默識養以湛深之思正色盡言見其剛大之氣第知許國不自為謀調萬物之鹽梅鼎方折足蓄九淵之雷電龍有逆鱗肫然獻忠聞者動色惟仁人獨勇於義雖昔賢猶病其難用之則

不負所學而求容捨之則自得於中而無悶然有德去
留之決乃本朝輕重之幾蓋為之兆而賜環故起於
家而持節先聲騰湧協氣薰陶姑慰一方之情尚違四
海之願謂宜端委盡發經綸斷國論於文昌紫微之廷
還士風如慶歷元祐之際炎未煩鑄遣將近終更慮折
族庖之刀願歸間道之璧自悲俯啄而仰顧孰肯右挈
而左提三年飽百里之艱難一旦有二天之臨照雖未
瞻於履舄如素出於門牆萬金書札之中尚蒙慰薦六

轡茵憑之側豈忍弃捐仰瞻鴻雁之飛不勝燕雀之賀

賀張總領啓

遠聞使指近在王畿竊謂一時人物之英豈顯平糴是以千里音書之賀未徹記曹不踰朞年果有新命升中郎於華貫總外計於上流喜溢三軍風行六路某官有雄識雅健之文而加之篤實有正大高明之學而揆以中庸暫擁皇華而按行獨當上意之選擇倚之於封疆扞禦所以養其望處之於錢穀浩穰又以觀其材江漢

數屯半天下勁兵之聚湖廣四面供軍中經費之須實
難其人可付此寄今以明公之至盛際於昭代之有為
春秋如大川之方增聲譽如北斗之高揭行其平生德
業之所蓄願以遠大規模而自期憂民憂國之深固其
素志足食足兵之外別有遠猷勲庸當自此而益新富
貴亦鼎來而未艾炎久拘吏鞅忽近師門興誦藹然皆
動色而相語私心喜甚不待言而可知未侍茵憑倍增
向仰

賀張倅啓

詔璽疏榮題輿借重外諸侯之守職在藩宣監御史之
嚴事皆闕決先聲藉甚衆志悚然某官今事指南儒流
華蓋倚徙藍田之千竹已著真清徊翔葉縣之雙鳬輒
騰治最不行捷徑以訖外庸對畫戟以交輝擁綈屏而
競爽得湖山之勝於坐上雖可登臨聽雞犬之聲於民
間未能富庶特煩半刺來貳五符佇歌別駕之功即拜
賜環之命展一編於籌策復三戟於門庭炎不憚折腰

只緣糊口有簿書，即有期會觸事懷憂。為保障不為繭絲視民，多愧轍中之魚涸矣。幕上之燕危哉。活窮鱗以一勺之清波，棲倦翼於萬間之廣夏，依歸之切，咏誦奚殫。

謝岳州劉守啓

宦牒縻於墨綬，幾不自量薦牘出於黃堂。素非敢望，未去覺吏民之改觀。將歸傳親舊以為榮，竊以作縣之難。今世以為通患，入官之意。古人亦或為貧，苟無拔萃之

才難副陟明之選災繆於擇地何以字民蕭條百里之窮瑟縮三年之久繭絲保障理不可以兩全刀筆簿書罪易盈於百謫幸玉音之有旨削版帳之無名部使者廉問至詳明府君奉行惟謹蘇疲民於憔悴之後脫小吏於煎熬之中已及終更未煩鑄遣念厥初之移病恐至噬臍及其後之丐祠又憂濡尾豈謂升階之漸乃承褒袞之華某官恕以及人清而容物假借屬縣輒符移趣辦之嚴收羅滯材借廊廟平章之用顧如炎輩所謂

輒生學術蓋空空然何能純正吏事又碌碌耳烏得詳
明弃之如犛牛之一毛取之非鴻鵠之六翮誤蒙慰薦
莫稱品題炎敢不行所聞知厲其遲鈍進修則勉諸在
已窮達則歸之於天無累知人斯為報德

謝薛漕啓

邑下效官初無善狀臺中取士俯及臞儒不止一諾重
於黃金是謂隻字踰於華袞未去覺吏民之改觀將歸
傳親舊以為榮且知人莫貴於知心而守已必先於守

道習俗之流弊也甚矣操履之有常者難哉自非卓爾之賢安得介然之節炎學非適用仕不逮人與物多違雖佩韋而自儆蒞官不敏顧製錦以何堪繭絲保障難至於兩全刀筆簿書易盈於百謫幸玉音之有旨削版帳之無名遂獲終更免煩鑄遣此心自揆竊憂日暮之倒行敢意深知乃謂歲寒之可保蓋某官斯文司命善類主盟聲名震於一時許與信於四海顧如炎輩出自寒鄉憐其困躓之孤蹤借以吹噓之餘論第慚固陋莫

副品題炎敢不行所見聞審於義利視桑榆之將晚素
髮雖生晞松柏之後彫丹心猶在益修志意以答恩私

雙溪類稿卷十五

欽定四庫全書

雙溪類稿卷十六

宋 王炎 撰

啓

通臨江丁守

攝官躡等幸充竹使之丞恭職前期不俟瓜時之代偶
塞上之失馬致楚人之得弓將聽命於黃堂敬通名於
尺牘某官器周于用實副其聲有卓越之行而裁以準
繩有精練之識而歛其鋒穎晉居內服思訖外庸分士

品流雖待陽秋之鑒問民疾苦尤深丙夜之憂乃輟含
香小煩憑軾況此江瀕之地適當水溢之餘擁和氣以
頒春慰空願之望歲政遂成於五月人皆有於二天白
叟黃童已受撫摩之賜赤墀青瑣猶虛英俊之躔即
可趣裝不惟增秩炎半生平進垂老倦游郡博士之
素餐自宜冰泠邑大夫之墨綬亦分陸沉豈期玷於
貳車乃獲依於瑞錦事從其長敢勤教戒之再三志在
斯民願贊循良之萬一

與孫判官

竹符立貳驟戒戍期蓮幕得賢相為交契通問之初宜
先於下執同寮之好當倍於他人某官冠冕甲門圭璋
寶器英才在外衆固惜其少淹婉畫佐州民實受其陰
賜乃者江流之羨溢至於歲事之大祲既有潛郎蒞
黃堂而畫諾亦資上佐班紅粟以振飢廣此仁聲趨
於夷路炎浮沈州縣荏苒歲時茲叨剖竹之丞不俟及
瓜之代雖曰幸而承乏恐戾官箴惟其有以告新願聞

誨藥

荅蔣教授

貳五馬之守忽及戎期登三鱣之堂將親察友緬想采
芹之樂重歌伐木之章某官吾道醇儒清時名士圭璧
不鬻於市內心惟貴於韜藏黼黻以昭其文衆目皆驚
其炳蔚羞著鞭於捷徑小休駕於泮林青佩聞風必欲
懇切作新而後已黃堂畫諾不妨從容諷議於其間華
問寢高亨途可卜炎半生隨牒垂老佐州雖細務米鹽

難免師儒之聽然忠言樂石宜資道誼之交願蠲苛禮
之拘攣共展雅懷之繾綣

上趙漕

攝丞支郡偶前一歲之期受察外臺幸近二天之庇必
先齋宿以請命方敢諏辰而造官某官學正而識深材
全而氣勁風采冠充庭之鵷鷺入處郎闡威稜重固圉
之金湯出分帥閫欲廣九重之視聽尚勤四牡之驅
馳馭吏在於選才秉公心而藻鑑足用本乎厚下擁仁

氣以薰陶值水溢之為災致歲祲之告病賴有皇華之
將指平頒紅粟以振飢衆若更生共咏輶軒之德朝多
虛位合歸文石之班炎冰冷起家陸沉隨牒泮林職散
已愧空餐凋縣財殫嘗憂傷錦心未忘於竊祿才不足
以佐州當務檢身仰俟六條之廉訪預期拭目瞻雙
節之照臨

賀周丞相

一札疏恩十連移鎮執玉以翼天子孰踰舊弼之良衣

錦而歸故鄉暫借專城之重幸忤懷之逮下輒薰沐以
輸誠某官命世真儒爽邦耆哲親逢舜禹之揖遜力整
臯夔之贊襄雖端委廟堂獨持天下之正然錙銖爵祿
兼得聖人之清不可招麾自為舒卷歸休間館疑與世
以相忘卧護价藩乃為民而特起以整暇練和門之步
騎以威懷綏徭戶之狂飈田里即安京師蒙福茲上湘
中之節遂分江右之符袞繡鼎來山川改觀輿情所向
甚於從二老以歸周宸眷有加何止倚二公而分陝其

忠誠足以主善類其仁勇足以定大疑諒方急於辰猷
必難稽於信處炎侵尋乎進流落倦游為客異鄉驟庇
身於節下得丞支郡行聽命於府中心方懷疏遠之嫌
天乃假攀援之便望綠水芙蓉之地願晉拜於上公無
落霞孤鶩之詞敢濫陪於下客

上謝尚書

貳剖竹之符祇戍期而代匱問鳴珂之里依耆德以為
師况蒙推轂之私倍切升堂之願某官識精而學正志

定而氣全淡泊深醇與世浮誇之習異清真樂易使人
鄙吝之意消曩在帝廷嘗居言路方未帥諫官而叩
閤孰知陽子之賢及其對人主而引裾乃服辛毘之
勇故身退江湖之上而名垂宇宙之中間館養高雖友
赤松而謝事嚴宸注想政資黃髮以詢猷炎陪健樂以
從游辱良齋之與進茲玷緹屏之任可聆革履之聲聞
郡事以通行深懼官箴之戾趨門庭而雅拜願聞誨藥
之詳

通韋倅

太常奏第偶聯淡墨之名別駕攝官獲在鳴珂之里三
紀嘆差池之久一朝有解后之因行且登門可無削牘
某官學窮道奧文掞國華試其才於繁劇之間不難掣
錦充於養以安恬之守聊復題輿有如執事之賢實列
勝流之數其鴻博宜紬書於虎觀其清修可端簡於烏
臺胡不高飛尚茲平進正恐未下車之際即聞不俟駕
之招炎揆日將行瞻風伊邇同年筮仕雖慚玉笋之英

序齒論交乃等棣華之好儻或許其承教庶不至於瘵
官夏令清和燕居暇豫願謹寢饗之節益申戩穀之休

通向倅

抵戍期而承乏濫陪五馬之車親耆德以為師獲在八
龍之里非先揆日以貢竿牘可遽趨風而望憑茵某官
六世故家五朝壽俊文簡之典刑未遠鄉林之聲烈如
存閱義理以養其心本不矜於進取據才猷而見之事
曾未究於施為脫屣如遺挂冠不顧傲睨功名之表倘

佯泉石之間雖外物輕於浮雲可激清風而厲俗然世
臣重於喬木當勤聖意以貪賢暫安鳩杖之間別有
蒲輪之召炎仰高甚久披霧無因豈意是行獲酬所願
從郡太守之後將勩力以奉公近鄉先生之尊宜齋心
而請益瞻承伊邇寤寐不忘夏令清和燕居暇豫異精
調於寢餼用倍納於休祥

通劉倅

散才無取濫充別乘之員厚德可親獲在鳴珂之里幸

登龍之有便值展驥之未行某官行修潔而無疵學高明而有用飛王喬之舄嘗自試以撥煩題仲舉之輿姑少安而養望况渚宮之巨鎮實邇瑣之上游中權必屬於重臣貳政亦資於名士如執事之素蘊乃諸公之熟知恐未及於下車已即趨於召節炎曩嘗披霧久不趨風抽毫難究於深衷揮麈佇諧於晤語

通王文州

通行郡事濫充別乘之員少憇里居知有分符之守將

欲前瞻於顏色合先自貢於姓名某官練達多聞靖恭
有守世家所自源既遠而流長人品不羣華亦榮而實
大甫金閨之通籍即畫戟之凝香閱循吏於漢京欲埒
龔黃之豈弟數勝流於江左宜班義獻之清真佇拜賜
環寧淹間館炎仰高甚久蒙潤有初自慚非鳳閣之崇
所願識烏衣之俊瞻承伊邇抃頌惟深

通趙知軍

貳車代匱偶前宦牒之期五馬旋歸聞有宗盟之重將

欲詣門而伏謁可稽削牘以修辭某官胄出神明志如
寒素準繩其行斧藻以文棣萼聯芳掩周室懿親之美
竹符分守追漢京循吏之風旣外振於能聲宜入陞於
華貫忠精劉向嘗紬中秘之書儒雅李程亦視北門之
草真材是用公族為先上心方俟於來朝除目即頒
於異數炎覲蒙霧潤久仰山高日虞召節之追趨莫遂
賓階之跪起有懷悃悃不盡編摩

上汪提舉

聽尚書之履銜恩早玷於師門瞻使者之車受察今居
於屬部况以佐州之別駕近於駐節之行臺代匱之初
竭情以告某官承家文獻許國忠嘉三典用中平竹書
之獻議一經垂遠廣金匱之舊聞凝旒欲審於觀風攬
轡遂煩於將旨莞山海之利上專瞻於大農備水旱之
災俯尤詳於荒政皎皎皇華之北陳陳紅粟之頒陰德
無窮何止萬人之活休功不揜佇聞四牡之歸且國莫
重於世臣而治必生於君子太傅股肱之美蕭咸嘗至

於大官贊皇骨鯁之剛吉甫遂登於上宰將由賢而佐
聖可考古以驗今災喜及戍期懼無治狀晚途猶滯空
慚鯉躍於龍津舊物不遺尚覬蠅隨於驥尾有懷悃悃
莫旣編摩

上譚提刑

攝丞支郡偶前一歲之期受察外臺仰戴二天之庇甫
諏辰而恭職即齋宿以修辭願霽威嚴仰陳悃悃某官
為時先覺得道正傳充所養則器大而聲宏見於文則

芒寒而色正順詩書以造士討論何止於解頤發倉庾
以振民愛利悉形於將指陋矣青蠅之點壁翻然黃鵠
之摩雲有以自娛堅杜門而避俗不容退處竟衣繡以
觀風其教條簡易而不苛其猷議清明而能恕環今日
乘輅之地無曩時珥筆之忙載考昔人崛起南紀遠則
開元之輔相近而慶厯之諫官惟山川之炳靈獨鍾間
氣如麟鳳之罕見為瑞清時是宜五管之提封今復一
賢之顓美暫勤攬轡即拜賜環高掩前修盡聽素蘊炎

起家冰冷隨牒陸沉製錦之傷偶爾終更於為縣覆車
之戒難乎承之以佐州自知無尺寸之長未免戀斗升
之祿預期拭目前瞻雙節之光華當務檢身仰俟六條
之廉訪

荅陳宰

揆日將行叨貳魚符之守瞻風伊邇習聞鳬舄之賢辱
貽問以相先愧謏書之不敏某官文傳正法學造大原
聲問最高宜立登於渠觀進趨有節乃屢試於琴歌寧

圓枘而方穿不直尋而枉尺其清介益堅於信道其慈祥逾篤於字民熙春常蒲於花陰凶歲不憂於菜色觀其感召已流三異之稱自此騫騰何待十奇之薦炎愧當佐郡喜獲同寮抽毫莫究於深衷傾蓋異諧於晤語

荅常宰

花縣得賢恨親仁之無自瓜時越次喜聯事之有期想聞百里之琴歌遽枉五雲之筆札某官東吳秀士西蜀名家望驥足於亨衢尚淹遐武露龍鱗於錯節自試長

才昨聞秋潦之餘適值歲祲之病細民相視固有空願
荒政具修皆無飢色繇此可書於優最即當徑入於脩
門炎流落陳人浮沉拙宦志未忘於仰祿才不足以佐
州恃寮友之切磋異能聞過贊教條而闕決庶免瘵官

上張總領

分教泮林嘗藉計臺之庇攝丞支郡又瞻使節之光有
天幸而能然如自謀而至此况視前車之顛覆尤依夏
屋之帡幪某官行應四科學包六藝緬懷先正勲勞在

盟府之藏今見名卿忠力篤世家之美洵更劇任茂著
真材將漕湘中蘇民情於遠服總儲淮右壯國勢於留
都冕旒有北顧之憂襟帶惟上游之重方急采薇之遣
戍必先積穀以實邊江漢數屯半天下勁兵之聚湖廣
四面給軍中經費之須爰仗信臣肅將隆旨望獨高於
喬木禮宜備於皇華旣士飽而馬騰亦粟陳而貫朽武
昌風月清談無取於元規赤壁江山英氣可追於公瑾
熟籌疆事歸贊廟謨明良相遇之難已親逢於熙運公

侯必復其始當力繼於戎功炎起自孤生安於拙官強
顏為縣不無傷錦之羞妄意佐州復有懲羹之慮方俛
啄而仰顧孰右挈而左提雖曰恪勤要在米鹽之必計
如其遲鈍尚期轡策之少寬免曠微官實憑大造

賀趙提舉

近輔解符大廷出節澄清所寄遣膚使以觀風選擇有
加命懿親而將指輿情胥慶德意來宣共惟某官系胄
出於神明文雅同乎寒素外司天族使之崇信厚而無

違入佐地官有以調盈虛而不匱少緩金閨之步聊凝
畫戟之香上念大江以西民更儉歲之患里閭張願待
哺之後政急撫摩州縣搏手無措之時尤期假借遂自
股肱之郡來顙耳目之司先聲一聞和氣四達然雅望
素高於中外且明時兼用於親賢誦棠棣之詩豈不懷
於召穆閱麒麟之畫亦有取於城陽恐甫駐於華輶即
趣還於文陛炎濫叨佐郡深懼曠官當務檢身仰候六
條之廉察預欣拭目瞻四牡之光華贊慶之私編摩

罔既

賀張提點

使名加大帝命更新廣一時軍國之儲莫先泉府整諸
道山川之產悉隸星輶幸藉庇庥敢稽贊慶某官勝流
華蓋今事指南方居璧水以談經聲已高於周士及入
金閨而通籍望遂冠於漢庭右府編摩外臺歛散雖階
華要未究猷為孰能操天下之贏資要在考古人之圓
法盡權實貨專任真材赤仄大錢不待三官之鑄黃金

上幣兼充二等之藏竊謂儒先出逢昭代其宿學宜讐
書於東觀其清文可揮翰於西垣恐持節之鼎來即賜
環而趣覲炎懼叨佐郡喜獲事賢自顧拘縻雖難瞻於
四牡有懷悃欵輒仰貢於雙魚

賀張提刑

光膺中詔移按祥刑地環江右者十州寄乘輅之廉問
境接鄱陽於一水同衣錦之光華望實素高恩威易洽
某官清通而知遠簡易而有文閱中興諸老之賢孰踰

先正歷膺仕四朝之久益振家聲溢浦偃藩湖濱將
指上心求舊深思喬木之世臣臬事持平無易皇華之
膚使况此俗工於訟牘繇其家習於刑書遂煩四牡之
驅馳仰達九重之欽恤以清明而察其浮偽以寬大
而息其紛爭佇俟褰帷當無珥筆然睿主龍飛之始
乃真才鴻漸之秋恐攬轡之鼎來即賜環而入覲炎懼
叨佐郡喜獲事賢居近鄭鄉慕誼固非一日身瞻漢節
依仁獨有二天頌咏惟勤編摩罔旣

賀趙帥

光膺一札就鎮十連攬膚使之繡衣久煩攝事開元侯
之幕府今乃為真條教素行歡謠增慶某官嘉猷經遠
深識見微昨自郎闈出當戎翰其策事如輕車之行熟
路其撥繁如利器之剗盤根報政既成亟上夔門之節
還中有漸來乘楚尾之輶屬大廷謀帥之難且方面偃
藩之闕擁雙旌而將漕聯三組以兼官孰踰文武之全
才終畀兵農之重寄煥壁奎而進直跨章貢以分符以

惠慈綏四野之耕桑以整暇總十州之步騎然睿主
龍飛之始乃真賢鴻漸之時授任專城雖有加於眷倚
遄歸清禁始大展於經綸興誦云然宸心可卜炎曠官
是懼佐郡何堪三月于茲已積素餐之譏謂二天在上
倍懷丹悃之瞻依咏頌惟勤編摩罔旣

賀陳運使

天廷出節澤國乘輅申命維新獨奉計臺之使指選才
已試無踰延閣之儒英望實素高恩威易洽某官識精

而學與志定而氣全司出納於南宮知足用裕民之要
正稽違於右轄有奉公振職之稱小出緒餘未攄素蘊
屬淵衷之重外寄清視以觀風權義利於重輕寧急舉
鞭之筭謹德刑於先後豈專持斧之威遂增六轡之光
華來導九重之志慮藉甚先聲之美藹然和氣之浮
第泰道之方亨值離明之繼照以辨博參稽於國論以
忠嘉啓沃於君心宜有追鋒按部難淹於鷄尾即聞前
席班朝首綴於蛾眉炎無以佐州未能忘祿方自憐其

坎壈乃獲近於悵懔小吏之事上官當恪遵於約束晚
學之從先進又有覲於品題贊慶惟深敷宣罔旣

上周丞相

名位至於絕百寮斯難攀附道德足以服一世可不
依歸况善類宜有主盟則來者固无絕法飛走之從
麟鳳殆欲去而莫能山海之集涓埃未有辭而不受輒
伸悃悃仰瀆威尊某官命世真儒爽邦良弼從容造
膝贊揖遜於睿謀懔惻沃心迪清明於初政號召四

方之豪俊鋪張萬事之規模風采凜然肯燕坐江沱之
表浮言過矣何毀傷日月之明敬惟元老之去留實係
本朝之輕重願從赤松爾豈昔賢之雅懷當如蒼生何
有天下之同欲况值皇明之繼照正資耆德之告猷雖
優游固可以保身而繼緒豈忘於體國其重望則在廷
之九鼎其深謀則當寧之元龜恐遠人必問萊公不宜
在外苟中國旣相司馬又復何憂人心有孚天意自定
炎起家冰冷隨牒陸沉年不後人時無知己妄欲通

名而自獻初非附勢而有求士上龍津皆受三沐薰之
賜身行驥坂亦期一盼睐之榮占小已之賢愚在片言
之可否

賀趙提刑

淵衷所向天指有加民吏聳聞益尊嚴於持斧山川不
改無勞勩於乘輅協氣滋多懽聲逾洽某官係時宿望
為國茂親分漢郡守之符治高近輔持周行人之節
望著皇華千艘內給於日畿六轡偏行於澤國其風采

精明而可敬其教條簡易而不煩上念祥刑欲達虞
廷之欽恤孰能淑問少懲楚俗之輕佻乃煩棠棣之賢
暫聽甘棠之訟况清明之初政資夾輔於諸公豈淹耳
目之司即在股肱之列炎佐州何算曠職是憂旣無一
日之長難於自免幸近二星之次照以餘光贊慶之私
編摩難寫

荅歐陽倅

熊軾在前愧乏題輿之譽龍門居右喜諧傾盖之私輒

修敬於尺書預通名於丈席某官操修清介醞藉溫醇
究撫字之心嘗不卑於墨綬貳藩宣之政亦聊擁於緹
屏顧茲一壘之封限以重湖之阻半刺雖分符之亞未
展猷為諸公有推轂之言宜陞華近即見賜環於帝
所詎容稅駕於里居炎妄意攝官何能佐郡如將弛擔
值從者之未行尚可負牆聞仁人之餘論

荅劉監酒

遠宦棲遲偶在八龍之里高情洒落驟來雙鯉之書欣

會面之有期愧馳詞之不敏某官搞文華瞻秉德清修
鬱喬木於百年家聲猶在騁驂騑於千里才氣無前暫
安莞庫之卑以養措紳之譽涵今茹古益新黃絹之色
絲發策決科當復青氈之舊物炎仰高甚久披霧無因
豈意是行獲酬所願逡巡傾盖可攄棠棣之思勉強抽
毫莫報木瓜之贈

回江宣義

東朝衍慶北闕疏恩嘉黃髮之脩齡賜綠衣之新命某

官儒流前輩昭代逸民緬想幽居有擊缶引觴之樂決
知雅志無彈冠結綬之思然子心必貴於顯親而帝
德方均於錫類喜夫婦康寧而偕老值朝廷希濶
之殊榮庭戶增輝里閭改觀異王符之縫掖徒號潛夫
笑德曜之荆釵空隨高士方圖奏記遽辱貽牋齒雖宿
而意新深嘆屬辭之妙麗年彌高而德邵尚期承教之
從容喜愧交懷有言莫盡

回崔秀才

力役先於溫戶法所當然追逮及於寒儒吏安取此薄
正舞文之迭遽承執贄之恭閱點綴於華牋知沈潛於
黃卷既免訟庭之牒愬可專蠶舍之修藏然籍隸民雖
受地一廛而勤動若登仕版則占田千畝而安閒因險
阻之備嘗請激昂而自奮用酬來貺少效愚衷尚冀高
明特垂鑒察

謝沈察院

北闕上書合俟刑於司敗西垣出命驟假寵於成均恍

如得仙疑以為夢且今日求言之匭如古人進善之旌
當離照之初升蓄乾剛而未發權臣跋扈偽黨附離人
誰無私專欲排於利已事既太甚曾不畏於欺君動震
怒於雷霆投渠魁於魑魅丕顯龍飛之華旦旁羅鴻漸
之真賢乃採嘉謀以裨新政豈無智者之慮安用狂夫
之言如炎者麤讀古文不知今事亦欲求於富貴圓枘
方穿孰肯薦其姓名左書右息政緣冰冷遂至陸沉蒲
柳之質望秋髮雖種種癸藿之生向日心則拳拳願輸

一得之愚仰徹四聰之聽書旣成而復毀意欲却而更前竟干蕭斧之誅盡獻芻言之陋鈞天帝所烏知蟣虱之微臣壁水英躔忽玷鵷鴻之末綴出綸有自推轂為誰某官德備清和氣函剛直鳳九苞而為瑞識者心降旁一角以觸邪聞之膽落薰蕕無臭玉石自分坐致朝廷之清明因搜人物之淹滯青雲今日未易攀援白首同年自甘流落何一貴一賤之勢異而三沐三薰之意勤殆欲與之同升不使終於獨困拔於散地實在勝

流自省何人可當此選未憂博士之得咎先慮諸生之
見嘲炎敢不仗此挈提起其衰懦籌當世之務非矜掉
舌之空談講先聖之經必使洗心於偽習儻無曠職是
曰酬恩

回蔣教授

才識之優素聞第一師儒之選果見無雙得龍友於渥
洼空馬羣於冀北某官鉤深學海挾藻士林八卦六爻
研義文之妙旨一風二賦振屈賈之遺音負此兩長超

然獨步暫時緩帶肯處諸侯半壁之宮不日曳裾徑登上帝羣玉之府豈圖孤陋獲識英髦健筆驚人共嘆陽春之寡和高軒過我乃蒙明月之暗投藏以為榮報於何有

謝張尚書

代

諫坡承乏初無補衮之忠起部陞華遽玷出綸之寵處非其稱愧溢於榮某非有長才素安拙宦久更州縣之役誤被聖明之知凡十薦而齒周行不三年而聯法

從晉居騎省兼侍金華既未能盡五諫之規亦無以發
六經之旨第欲明於國是義不顧私嘗力詆於邦誣言
多拂衆方祈補外以避咎乃更留中而得遷顧晚節之
浮沉遂班常伯念平生之夢想不到文昌自視歉然何
由得此某官承家文獻許國忠嘉御衆牧民分吾君之
憂顧好賢樂善如先正之公平靖言僥倖之多必借游
談之助方圖叙謝遽蒙賜錦綉之章但喜拜嘉終莫致
瓊瑤之報

賀張尚書

代

一札疏榮十連移鎮赤文綠字冠學士之清班絳節碧
幢開元侯之幕府教條風動民氣春回某官敏識照微
宏才經遠出遇孝宗之神聖遂亟上於亨途仰承魏
國之忠勤將大恢於前烈乃由武部游偃价藩壯邊瑣
之金湯謹陪京之莞鑰賢勞如此王覲何遲正緣謀元
帥之難且復借中權之重披圖輿地撫一道於西江占
象璇霄煥二星於東壁消里閭之愁嘆變旗幟之精明

既訖外庸上心所向即還近列僉論攸同某廁跡日
邊受廩宇下擬謄書而未果愧貽問之相先久隔英姿
思聽漢庭之革履既知世德請賡鄭國之緇衣

回丁茶馬代

諫省充員甚慚無補文昌分職乃獲超遷靜言徼倖之
因殆有游揚之助某官敏銳而便煩劇激昂以赴功名
歷井捫參萬里肅將於使旨摘山市駿六軍增壯於戎
容裔夷信服其廉平屬部聳聞其風采汎閱當今之人

物孰踰執事之才猷豈無衷言猶在外服有如戇拙洊
列清華欲修謝而未遑辱貽音之下逮木瓜有贈不能
視施而酬茅茹同升但冀勞來之喜

回吳兩府

代

擢司事典甫再閱於旬時晉長兵曹遽游膺於新命殆
因長者之借譽遂玷公朝之誤恩某官貴重至於上公
清苦同乎寒士居京師奉朝請絕無悔吝之疵開幕府
班教條輒上循良之最醞藉之美雍容可觀左戚右賢

雖曰祖宗之舊典經文緯武孰知天下之全材宜繇
肺腑之親入在股肱之列某自登朝著獲際下風竊揆
雅懷蓋尊主庇民之是念孰觀曠度亦好賢樂善以
為公故此超踰出於推輓未遑叙謝先辱貽音櫟括之
工文從而字順金珠之重意盛而禮勤徒極銘藏莫酬
珍貺

回朱經幹

上書論事自哂其狂倚席談經甚慚非據誤被聖明之

米擇殆因朋舊之吹噓恭惟某官學知本原文有典則
始偕郡計早飛第一之聲旋入郊庠果見逸羣之氣詎
宜屈高士以主簿聊復為上客於諸侯蓋春容旁薄而
其進也徐則演迤淵淪而所行者遠將益充於器業以
大奮於功名顧惟學問之荒濫處師儒之後方圖叙謝
遽沐貽音八桂間闕念故人之方遠雙魚繾綣感厚意
之難酬銘佩之私編摩莫旣

雙溪類景卷十六